



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8

**Israel 'hit squad'-i West Bank
moziki ka nung nisung 3 kaset**

**Crystal Palace-i defender
Daniel Munoz alizukogo**



VOL. XXI ISSUE NO. 108 (ADOK 108) DIMAPUR

RASEMNÜ (WEDNESDAY)

ANJETI (JANUARY) 31, 2024 ₹ 5.00

T. John Longkumer-i SEC inyaktsü

Dimapur, January 30, 2024 (TYO): Nagaland nung State Election Commissioner inyaktsü atema T. John Longkumer, IPS, Retired DGP shimba osang metetdaksüogo.

Nagaland Governor-i T. John Longkumer, IPS shimba osang metetdaksüba nung pa küm 5 (pungu) mesüra arishi küm 65 atong tashi iba mapa inyaktsü ta

shisema lir. State Election Commissioner (Condition of Service) Rule, 2023 nung Rule 3,5,6,7 & 8 den putepa State Election Commissioner inyaktsü atema T. John Longkumer IPS, Retd DGP. Nagaland shimogo ta Additional Secretary to the Govt. of Nagaland T Nchumbemo Odyo, NCS-i sangdong ka nung ashi.

NBSE Hon jubilee benjungmong tenzükogo

Kohima, January 30, 2024 (TYO): Nagaland Board of School Education (NBSE) tenzükur küm 50 ajungba benjungmmong Mongulbarnü Kohima nung tenzükogo.

Iba sentong nung School Education and SCERT Advisor Dr Kekhrielhoulie Yhome-i Golden Jubilee race ta ser curtain raiser programme tenzükja liasü.

NBSE nung zungsema aliba school 49 nungi class 10-12 tsungda kaketshir 600 shi kati High School Junction nungi Assembly Secretariat Junction tashi asemtepa nung shilem agia liasü. Iba sentong ya 'learning is a marathon' omen nung ajemdaker agi.

"Shisaliok tsütsü Nagaland ya kanga dang lanu lir kechiyong Naga nung dangi azungtsü-zülutsü ya menur ang aru" ta Advisor Yhome-i ashi.

"NBSE kanga dang temaba jenjangi tuogo aser temulung lemtettsüsa kümogo. Linük nung language skills asadanga den student's report cards nung tebo o tetsü tenungtem zuluokba mapa ya NBSE-i mezung tenzük" ta pai ashi.

"NBSE-i küm 50 tashi Nagaland nung alirtem nem educational service inyaka aruba atema tenungsang agütsür. Küm 50 ya mapang talangka lir aser tesübatem repringshia asenoki koma renloka aru asadangsüla" ta Advisor Yhome-isa ayongzük.

Sentong nung SCERT and School Education Commissioner and Secretary Kevileno Angami-

i salem metetdaksü aser NBSE tenzükertem nem tenungsang agütsü.

Tayongzükbatem liaka NBSE ya North East region nung kanga dang tongtipang kümogo ta Kevileno-isa ashi.

"NBSE ya 1973 küm Nagaland Legislative Assembly Act No. 4 ajanga tentet aser 1974 nungi mapa inyaktsü tenzük" ta NBSE Chairman Asano Sekhose-i ashi.

NBSE-i tayongzükba jenti ajuruaka linük den liromedema education jenjang ayutsü meranga aruru. NBSE ajanga aika ajangetogogo saka ano aika ajangettsü anünga lir, ta lai ashi.

"National Education Policy 2020 den liromedema asenoki education yanglushitsü nungdaker. NBSE-i NEP 2020 mapa tenzükogo aser tanü kaketshirtem ya khuret kokteter akümtsü atema tesayubatem agütsür" ta Asano-isa ashi.

Mongulbarnü Golden Jubilee race nung takok angurtem:

Girls category: Champion - Cekrotalu, Class 11 Bayavu HSS; second - Nirmala Rai, Class 12 of Mt. Carmel HSS & third - Vilesienuo Mepfhuo, class 10, Christ King HSS

Boys category: Petevituo Yhome, Class 11 student Northfield, Khikha; Seyedielie Chuse, Class 12 Mt Sinai HSS & Gwakenye Khing, Class 11 of Don Bosco HSS.

Mezung jenjang takoker shia nem Rs 10,000, tanabuba jenjang nem Rs 7000 aser tasembuba jenjang nem Rs 5000 senpettem agütsü.

PM Modi-i Feb 4 nü Assam semdangtsü

Guwahati, January 30, 2024 (Agencies): Prime Minister Narendra Modi-i February 3 nungi tenzükka anogo ana atema Assam semdangtsü.

Iba mapang PM Modi-i Rs 10,000 crore endoka yangluba mapatong balala tenzüksütsü.

Prime Minister Modi-i February 3, 2024 nü Assam-i arutsü aser tasung state nung mapatong aika inyaktsü lung azungtsüba den mapatong aika

lapoktsütsü.

Assam nung Prime Minister Narendra Modi-i tenzüksüba mapa tongtipang kaji Asom Mala 1.0 project lir. Pai iba mapatong ya February 7, 2021 nü tenzüksü aser iba ajanga Assam nung road infrastructure renlokba nung shilem tajung agia arur.

Tang pai Assam semdangi arudanga tongtipang mapatong aika tenzüksütsü teimla lir.

Mokokchung nung lanur zünger mapa mongui alirtem nem mapa agütsüba sentong kadagi



Fazl Ali College Mokokchung nung Mega Job Expo 2024 sentong akadang District Planning & Development Board, Chairman & Advisor, Water Resources Wb. Tongpang Ozüküm-i jembidang tangokba noksa angur.

Mokokchung, January/ Aenjeti 30 (TYO): Mokokchung District Planning & Development Board (DPDB) aser ano District Skill Committee telok ana ya semteper "Connecting Careers" ta asüba omen nung ajemdaker Naga nung zünger mapa mongui alirtem nem mapa nung anioktsütsü asoshi achayanga Fazl Ali College Mokokchung nung January 30 nungi January 31 nü tashi "Mega Job Expo 2024" sentong kadagi.

Iba osang zülü tashi nung Naga nung lanur zünger alir mapa aginer 1500 temai tenung zülüoka mapa agitsü asoshi iba Mega Job Expo 2024 sentong nung dendagi.

Tanu iba sentong nung Mokokchung District Planning & Development Board, Chairman & Advisor, Water Resources Wb. Tongpang Ozüküm-i jembidang Naga lima nung Naga nung lanur zünger mapa mongui alir nem mapa bushia kishizung tashi bener arutsüba sentong "Mega Job Expo" mapa ya Nagaland state nung mezungbuba lir, aji asünung lanurtemi iba

maongka ya temoatsü ka ama agiang ta mapa aginertem aser adenshia aliba lanurtem ayongzükka ashi.

Nagaland state nung Government mapa inyakertemji kangasa tali kümogo, ibaji ajanga tetsükdaktsü ajuruba agi jokola state sorkari government mapa nung alirtem kanga junga mita asadanga tajemba akümtsü asoshi inyakdagi, anungji lanurtemi private sector mapa nung temelung agujang iba Mega Job Expo maongka ya agiangta Advisor Tongpangbaisa ajungshia ashi.

Lanurtem tanga state-tem nung tsurabur sen indoka küm aika zünger degree balala nung akoshia zünger arutsü aser asen lima sorkar mapa tilaka 4 grade amala bushitepa ngua kanga dang temelung shiranga bilemer. Tazungertemi zungzükur kelen tanga state-tem nung mapa inyaka sen aahzükang aser iba senji asen lima nung indoka asen lima temoatsü lima yanglutsü merangangta Advisor Tongpang Ozükümisa lanurtem ayongzükka jembi.

Kasa sentong nung Mokokchung Deputy

Commissioner & Mega Job Expo 2024 Chairman, Planning Committee Thsuvisie Phoji-i tarurtem pela agizüba o jembiba den Mega Job Expo 2024 Secretary, Planning Committee Er.T. Imlisünep ajanga iba Mega Job Expo 2024 sentong akaba teratet tejangja telok den lemsatet aser iba den ano Fazl Ali College Vice Principal Vinod Kumar, Bussiness Association of Nagas nung President Wb. Mongküm Jamir aser Japanese Teacher, Nagaland Arms Center Takumi Ishiwatari par asemia shilem agia jembiba den Mega Job Expo 2024, Planning Committee Member P. Tiatemsü-i tepela o jembi aser Ao Baptist Arogo Mungdang Youth Secretary Toshi Sanglir-i Tsüngrem dang temoatsü meshia sentong tenzük aser Dr. Limasenla Jamir ketdangsüba nung iba sentong agia liasü.

Iba Mega Job Expo 2024 nung Naga nung lanur zünger alir mapa aginer 1500 temai tenung zülüokaser item rongnung Shamator district nungi 45 aser Mon district nungi 35 ta lir.

Myanmar den FMR magiendaktsütsü: NSCN/GPRN (K)

Dimapur, January 30, 2024 (TYO): Naga nungeri Centre nem India aser Myanmar arrtsülen Free Movement Regime manendaktsütsüla ta NSCN/GPRN (K) lennir Nikki Sumi-i ashi.

India sorkari Naga nung den masüngdangtepi arrtsü ka latetra ibaji kanga dang aibelen mapa ka asütsü. Naga nung longjemer lemtet takang ka agira iba teblemstü ya

samadaoktsü, ta Nikki-i osangbener dang ashi.

Tesüiba nung FMR ken o adokdang Khapläng lenisüba kübok NSCN/GPRN-K den Eastern Naga telok kari anema noktak. Idangji Naga nung aikati onok den maden, ta paisa ashi.

India-i Naga nung ya ila meblemstüla aser külen Naga nungeria longjemer ola adoktsüla ta NSCN/GPRN lennirisa ashi.

Naga nung shisashirtemi Naga yimtenren temetentem angateta lir saka parnok ishikati dang Naga yimten teblemstü atema inyaker. Anungji nisung teimbai iba mapa asoshi inyaktsü nungdaker, ta Nikki-isa ashi.

Naga nungeri balaka linüba taginüba nung NSCN/GPRN noktaka lir aser yimten latetba nung sendaktepa alir ajak adentsüla ta paisa shisem.

Chümoukedima nung VVIP Guest House asadangogo



Dimapur, Aenjeti/January 30 (TYO): Tawa Chümoukedima, Nagaland nung yanglua semzüker aliba VVIP Guest House Accessibility Audit Inspection ka Rights of Persons with Disabilities Act, 2016 dak ajemdaker 17.11.2023 nü agiogo.

Disability Commissioner Diethono Nakhro lenisüba nung State Commissioner for Persons with Disabilities (SCPD) team-i shilem agi aser Police Department nungi Comdt 1 NAP Bn Aaron Patton den Engineers, Police Project nungeri iba ki asadanga liasü.

Ki tasenba asadanga sülen SCPD Diethono Nakhro-i, kidang lenla kar nung accessibility standards sülen manidakba indang metetdaksü aser tetuyuba kar agütsüogo koba ita asem tsüingda jenjang tapet agia SCPD Court nem Action Taken Report benoktsüla.

Tetyubatem:

1. Kikümtong

Kikümtong nung teyari agitsü atema hand railing densema ramp ka yanglutsüla. Tang iba kidang ramp ya ki tesülenang yanglua aliba nguogo, koba tetezü wheelchairs amala assistive aids amshir lemtamatar ajak ki tesülen nungiang iba kidangi

itettsü, koba mesenmetui amshiba ka lir.

Harmonised Guidelines aser Standards for Universal Accessibility in India 2021 accessibility standards, kong proper gradient, surface continuity, width densema lir iba sülen anidaka yanglutsü atema iba ramp ya ken o dak sendaka aliba ketdangsürtem den tongteprtepa inyaksüla.

2. Kishi

(i) Dining room amala takdang balalai aiba kishi ajak tuluba küma yanglushitsüla.

(ii) Metsümeshidaki aiba kishi-a sadema yanglutsüla, ajita asünungdang ajaki sadem sadema amshitetsü.

3. Metsümeshidak/Utilitiie:

Ki ajunga nung amshitetsüsa toilet ka danga mangu.

(i) Grab bars, railings, atongtsüsa tasazük shidak nung yanglua aliba washbasin amala tenüngdakba facility tem keter metsümeshidak ka alitsüla.

(ii) Metsümeshidak kishi nung barriers (water stoppers) inoka aliba ya agintsüla kechiyong iba ajanga lemtamatar tem dang masü saka senzüsönpong mesademi kümer aliba tintet rogotem nema timtem agütsür.

(iii) Front Desk/Reception tesem ya Guidelines kübok tetuyuba agütsür aliba ama

yanglutsüla.

4. Elevator/Lift:

(i) Guidelines kübok tetuyuba agütsür aliba standards aser specifications dak ajemdaker elevator/lift kabosa toktsütsü asadangtsüla.

(ii) Lift tem anepalutsü atema maintenance crew toktsütsüla.

5. Signage:

Accessible signage aser lenmang bushitsü atema map tem tongtibang tesemtem nung toktsütsüla, kong raised mesüra tactile letters, high contrast colours, aser Braille mesüra tactile symbol tem densema alitsü nüngdaker. Tactile guiding paths aser staircase tem nung colour contrast ya ki ajunga nung agütsütsüla. Signage ya jongdak mapang atema evacuation plans aser exit routes atema-a agütsütsüla.

6. Accessible Room/Suite:

Floor ajak nung takdang/suit kakabosa tenüngdakba facility tem amenokja lemtamatar atema toktsütsüla, kong accessible door handle, switch board, faucet, hand railing, grab bar, shower seat amala furnishings, fixtures tem densema lir aser lemtamatar sadem sadema senzüsü atema tetsükdaktsütem ajak agintsütsüla.

7. Harmonised Guidelines aser Standards for Universal Accessibility in India 2021-i tetuyuba agütsür aliba sülen anidaksüla aser ajang ajanga benoktsüla.

Osang ajanga ashiba agi, Chümoukedima nung VVIP Guest House ya ken o dak sendaka aliba department nem ano officially bendanga magütsü, kechiyong ki ano merenemi lir. Ibayongji SCPD-i temelenshitsü aser bendenoktsü alibatem indang tetuyuba balala agütsüogo.

Ex-servicemen tem physical fitness test agütsü

Dimapur, Aenjeti/January 30 (TYO): Extra Assistant Commissioner, Mokokchung Vitulu-i sangdong ka ajanga, Assam Regimental Kendra nungi osang agizükba dak

ajemdaker Ex-Servicemen tem DSC nung tanaben employ asütsü atema February 5 aser 6 nü physical fitness tetendangba agütsü ta metetdaksüogo.

Assam Rifles-i tenüngdakba osettem agütsü



Dimapur, Aenjeti/January 30 (TYO): Assam Rifles Civic Action Programme kübok January 30 nü Kohima, Nagaland nung Pfachatsumia Student Union Library yanglushitsü aser Modernisation atema Assam Rifles-i Bookshelves 10, Study Tables 2 aser menden (chair) 36 agütsüogo.

Iba sentong nung Kohima Village Gaon Budha Thalhoo Mere, Pfachatsumia Student Union tir Ruokuovituo Mere

aser Pfachatsumia Khel aser Kohima yimtsüing nungi tanga züngsemtemi shilem agia liasü.

Iba project ajanga kaketshir 100 ajanzüksü. Nüburtem den tesunep nung alitsü aser tesendaktep tashi taitba kümdaktsütsü asoshi Assam Rifles omen "Sentinels of North East" dak ajemdaker inyakyim tajung benoka inyakba atema kaketshir lokti tentet züngsemtem aser Village Council-i AR dang kanga pelaba lemsatepa liasü.

NSCN- R züngsem ka bendanga agütsü

Dimapur, Aenjeti/January 30 (TYO): Assam Rifles-i tanen makai jenjang tapet agiba ajanga NSCN-R (Reformation) Public Relation Officer ka Mon District kübok Aboi jila nung Assam Rifles matsüingdang bendanga agütsüogo.

Pai .22 mm Pistol ka aser injang ana bener bendanga agütsü liasü.

Pa 2015 küm nungi NSCN-R (Reformation) nung inyaka liasü aser rakzükrakdemba, sepaitem belenshiba aser par telok atema logistics achaayangtsüba nung shilem agia aruogo.

Security forces-i taoba ita ishika iba nisungba ya mesüzüksü meranga arur tang bendanga agütsü temai adoktsü mesüzüktetogo.

Mokokchung nung Mega Job Expo akaba ajanga lanurtemi mapa aika angutsü



Fazl Ali College Mokokchung nung Mega Job Expo 2024 aliba mapang Job Partners-tem aser mapa aginer lanurtem shisalemsatepba mapang tangokba noksa nung angur.

Mokokchung, January/ Aenjeti 30(TYO):Fazl Ali College Mokokchung nung January 30 nungi January 31 nü tashi "Mega Job Expo 2024" akaba sentong nung Naga nunger lanur zünger alir

mapa aginer 1500 temai tenüng zülüok aser item rongnung Shamator district nungi 45 aser Mon district nungi 35 ta aruagi dendagi. Mokokchung District Planning & Development

Board (DPDB) aser ano District Skill Committee telok ana ya semteper "Connecting Careers" ta asüba omen nung ajemdaker Naga nunger zünger mapa mongui alirtem nem mapa nung aniooktsütsü

asoshi Job Partners ajak agi 28 aruagi lanur zünger mapa mongui alirtemji pei-i aginüba mapatem nung tenük yoka tenüng zülüokogo.

Job partners-temji International partner-1,outside state nungi-3 aser Nagaland state aser Mokokchung district nungi 24 ta lir.

Mega Job Expo 2024 partners-tem yagi lanurtem pei jangraba mapa aser pei azüingba yari mapa agütsütsü aser item rongnung Gari anishitsü(Driver) amala nungi tenzüka C-Edge College nung ita 6 training agir kelen Japan nung mapa agütsütsü, Chief manager Post, School Headmaster, Mechanic, Project manager, Life Insurance Corporation of India nung inyaksü asoshi mapatemji lir.

India state balala talisa

Maharashtra, Gujarat,Tamil Nadu, Madhya Pradesh state-tem nung aser Pune, Indore, Thane amala city-tem nung mapa aika tejangja agütsütsü. Tali temoatsü kaji ano Indian Passport akartem asoshibo tanga linük nung mapa inyaksü asoshia maongka agitetsüsa lenamngtem lapoka aliba iba Mega Job Expo 2024 ajanga agitetsü.

Mega Job Expo 2024 nung Job Partners-temi lanurtemi pei tenüng zülüokdang pei-i jangraba mapa zülüokba ama pei tata mapa asoshi Job Partners-temi lanurtem shia dang kechiba pai/ lai iba mapa inyaker ano Job Partners-temia kechiba parnoki lanurtem nem mapa agütsüner itemji arok aroka shisadanga lemsatepa mapang agia shisalemsatepa liasü.



New Delhi, January 30, 2024: Linük tebuti Mahatma Gandhi asüba anogomong nung Rajghat nung linük Tir Droupadi Murmu, tatong tir Jagdeep Dhankar, Ato kilonser Narendra Modi, Union Defence Minister Rajnath Singh aser tangartemi Mahatma Gandhi nem akhüm agütsüba sülen tangokba noksa nung angur.

SP-i Lok Sabha election atema candidate 16 sangdong

Lucknow, January 30 (Agencies): Mongolbarnü Samajwadi Party (SP)-i taruba Lok Sabha election atema mezüngbuba shilem nung candidate 16 tenüng sangdongogo. Uttar Pradesh Chief Minister, Akhilesh Yadav kinüngtsü aser Mainpuri Lok Sabha menden nungi MP, Dimple Yadav-i maneni Mainpuri menden nungisa tokteptsü. Tanünga candidate 16 ji Shafiqur Rahman Barq (Sambhal menden), Ravidas Mehrotra (Lucknow), Akshay Yadav (Firozabad), Devesh Shakya (Etah), Dharmendra Yadav (Budaun), Utkarsh Verma (Kheri), Anand Bhadauria (Dhaurahra), Anu Tandon (Unnao), Naval Kishore Shakya (Farrukhabad), Rajaram Pal (Akbarpur), Shivshankar Singh Patel (Banda), Awadhesh Prasad (Faizabad), Lalji Verma (Ambedkar Nagar), Ramprasad Chaudhary (Basti) aser Gorakhpur menden nungi Kaja Nishad nungir lir. Opposition INDIA teloktep nung densema aliba Samajwadi Party-i Congress nem menden 11 lemzüksüogo.

Chhattisgarh nung Maoists telungpur den raradang sepai 3 asü

Raipur, January 30 (Agencies): Mongolbarnü Chhattisgarh nung Maoists telungpur den raradang sepai asem asü aser 16 yiruogo. Sukma-Bijapur arrtsülen Tekalgudem yim anasa security sepaitem aser Maoists telungpurtem tsünga rara. Sukma district nung sepaitemi telungpurtem mita aoba mapang nung telungpurtemi tama injang khalokja liasü. Maoists telungpurtem inyaksangshi mita reprangtsü aser yangji aliba nüburtem yaritsü atema sepaitemi Tekalgudem yimdak security camp ka amenoka lir. Camp amenokba sülen CoBRA, STF aser DRG sepaitemi Jonaguda-Aliguda area nung telungpurtem mita aoba mapang nung Maoists telungpurtemi tama injang khaloktsü. Parnok tsünga khatepba sülen telungpurtemji arem telungi jena ao. 2021 küm nunga kasa tesem nungji telungpurtemi sepai 23 khaseta liasü, ta Bastar IG, P Sundarraj-i metetdaksü. Tawa Union Home Minister, Amit Shah-i Chhattisgarh yimtiba, Raipur nung senden ka ayongzüka Maoists telungpur tebilemtsü atema o lemtepa liasü. Iba senden nungi Amit Shah-i, taruba küm asem tsünga Maoist ya meshimeshia samatsüsüla, ta jembia liasü.

Budget senden matongdang anenja aliba MP tem ajak agizük

New Delhi, January 30 (Agencies): Mongolbarnü Parliamentary Affairs Minister, Pralhad Joshi-i, Parliament nung budget senden matongdangsa Lok Sabha aser Rajya Sabha naprongla nungi anenja aliba MP tem ajak agizükogo, ta metetdaksü. Budget senden ya January 31 nungi tenzüksü. Taoba ita asükwa mongpu Parliament senden amenba mapang Lok Sabha nung security raksaba atema opposition MP temi Union Home Minister dang nungi telangzüba meshia longkak aitba mapang nung MP 146 anenja liasü.

Budget senden jelia party ajak senden ka amenba sülen osangbener den jembidang Parliamentary Affairs Minister Pralhad Joshi-i, "Anenja alirtem ajak agizüktsü. Ni (Lok Sabha) Speaker aser (Rajya Sabha) Chairman na den jembigo. Sorkar tenüng nung ni tena nem temepishiba agüja liasü," ta metetdaksü.

"Iba ya Speaker aser Chairman dak keta lir. Anungji onoki tenaprongla dang privileged committees den jembiba sülen anenja alirtem agizüka senden nung adentsü atema parnok nem maongka agüjang ta mepishia liasü. Ajioda tenapronglai melungogo," ta paisa metetdaksü.

Taoba ita Parliament nung MP temi takhangba agüja longak aidang senden junga magitetba atema House anaprongla nung opposition MP 146 anenja liasü.

MP 146 nungjagi parnok 132 bo mongpu senden piyong atema anenja liasü, saka senden tembangba sülenbo agien. Ajisüaka tanünga MP 14 (Rajya Sabha nungi 11 aser Lok Sabha nungi 3) atemabo privileged committees nem agüja liasü.

January 12 nü Lok Sabha Privileges Committee-i Lok Sabha MP 3 agizük aser tanü (Bodhbar) Rajya Sabha MP 11 anenja aliba agiena agizükogo.



Circle Sastra: Imphal
Kwakeithel Thokchom Leikai, Imphal
 E mail: cs946700@pnb.co.in

SALE NOTICE FOR SALE OF IMMOVABLE PROPERTIES

E-Auction Sale Notice for Sale of Immovable Assets under the Securitization and Reconstruction of Financial Assets and Enforcement of Security Interest Act, 2002 read with provision to Rule 8 (6) of the Security Interest (Enforcement) Rules, 2002. Notice is hereby given to the public in general and in particular to the Borrower (s) and Guarantor (s) that the below described immovable property mortgaged/charged to the Secured Creditor, the constructive/physical/ symbolic possession of which has been taken by the Authorized Officer of the Bank/ Secured Creditor, will be sold on "As is where is", "As is what is", and "Whatever there is" on the date as mentioned in the table herein below, for recovery of its dues due to the Bank/ Secured Creditor from the respective borrower (s) and guarantor (s). The reserve price and the earnest money deposit will be as mentioned in the table below against the respective properties.

SCHEDULE OF THE SECURED ASSETS

Sl. No.	Name of the Branch	Description of the Immovable Properties Mortgaged/ Owner's Name(mortgagors of property/ ies)	A) Dt. Of Demand Notice u/s 13(2) of SARFAESI ACT 2002 B)Outstanding Amount as per respective demand notice C)Possession Date u/s 13(4) of SARFESI ACT 2002 D)Nature of Possession Symbolic/Physical	A)Reserve Price (Rs. in Lakhs)	Date/ Time of E-Auction	Details of the encumbrances known to the secured creditors
	Name of the Account			B)EMD (last date of deposit of EMD) C)Bid Increase Amount		
1	Dimapur (045120) Delight Furniture 0451210031259 Mr. Joseph Mero, S/O Mr Wezhietsu Mero Prop: Delight Furniture House No 288, Naharbari, Dimapur - 797112 Mortgagor:Wezhietsu Mero	All the part and parcel of Landed property measuring 01B-03K-10L in the name of Wezhietsu Mero under Dag No.55, Patta No.21 under Naharbari Village Mouza No 3 at Dimapur Nagaland which is butted and bounded on the North :by approach road of Smt Alila Ao, on the South: By the land of Mr Ranjit Meech and Wati Ao, on the East: by land of T C K Lotha, on the West: by Naharbari Road	A) 23.04.2018 B) Rs.41,85,172/- + further interest C) 20.10.2018 D) Symbolic	A) Rs.131.15 Lakhs B) Rs. 13.11 Lakhs, 14.02.2024 C) Rs. 0.20 Lakhs	15.02.2024 From 01:00 PM to 04:00 PM	NIL

TERMS & CONDITIONS

The sale shall be subject to the Terms & Conditions prescribed in the Security Interest (Enforcement) Rules 2002 and to the following further conditions:

- The properties are being sold on "AS IS WHERE IS BASIS" and "AS IS WHAT IS BASIS" and "WHATEVER THERE IS BASIS"
- The particulars of Secured Assets specified in the Schedule hereinabove have been stated to the best of the information of the Authorized Officer, but the Authorized Officer shall not be answerable for any error, misstatement or omission in this proclamation.
- The Sale will be done by the undersigned through e-auction platform provided at the Website <https://www.mstcecommerce.com> on from 01:00 AM to 04:00 PM.
- For detailed term and conditions of the sale, please refer www.ibapi.in, www.tenders.gov.in, www.mstcecommerce.com <https://eprocure.gov.in/epublish/app>

Place: Imphal
Date: 31.01.2024

Authorized Officer
Punjab National Bank
Secured Creditor

STATUTORY SALE NOTICE UNDER RULE 8(6) OF THE SARFAESI ACT, 2002



TIR YIMYIM

YIMOBILEM (EDITORIAL)

DIMAPUR RASEMNÜ, JANUARY (AENJETI) 31, 2024

Manipur nung yimjung nüngdaker

- P Tiamongba Aier

January 24, 2024 nü Imphal nung Arambai Tenggol-i senden ka ayonga amenba ajanga Manipur nung kin o kin tsüngda rara kanga shisanga kümogo kechiyong iba senden nung Meitei nung MLA 36 aden. Iba senden nung Arambai Tenggol ajanga akhangba onüktem nung Meitei MLA temi sign asü. Iba nung Kuki teloktem den Suspension of Operations (SoO) agientsüba, Myanmar nungi aruba refugee tem Mizoram-i yoktsüba, 1951 küm base year ser National Register of Citizens (NRC) renemtsüba aser Scheduled Tribe list nungi Kuki nung agientsüba onüktem lir. Iba ajanga Imphal Valley adena orr aliba tenemtem nung aliba Kuki nung putepshitsüba mapa kanga tasak akümtsü kechiyong Arambai Tenggol telok ajanga kin o kin rara tali tuluba kümdaktsür ta tai tongloksür. Manipur nung Meitei nung MLA temi Constitution kübok tezüngzüktep agia lir saka parnoki yimjung aser tensa süngjemdaksütsü melena Arambai Tenggol taginüba sülen ang anidaktsü mulunger ama sayuogo. Arambai Tenggol ya 2020 küm tentet aser tesüiba ita 9 tsüngda Imphal Valley nung parnok pusemer aika anitenogo. Parnok armed cadre 2,000 shi ka lir lendenlen volunteers nisung meyirjang aika lir. 2023 May ita rara adokba sülen Kuki nung den raraba nung Arambai Tenggol yakbang ser inyaka arur. Arambai Tenggol züngsemtemi anir state armouries nungi prangpong-injangtem auyaogo aser parnoki Meitei yimtsüngtem anüker. Tensa mejungi akümba sülen tetenzüklenbo Manipur Police-i Arambai Tenggol anema FIR aika benoka liasü. Bodbarnep Arambai Tenggol tanishisang Korounganba Khuman pa bodyguard temi meiner Kangla Fort-i arudang central armed police forces (CAPFs)-i tezülen nungi repranga liasü. "Speaker-i Assembly indang special session ka jazükba mesüra Chief Minister-i all-party meeting ka ayongba ama liasü" ta Manipur security ketdangsür kati iba senden atema jembiba angashir. Tawa tu Centre sorkari Interlocutor A K Mishra-i anir teshimtet telok ka Manipur-i yokdang Arambai Tenggol dena ajurutepegogo aser iba ajanga parnok ya Manipur nung tongti telok ka akümba sayur. Arambai Tenggol dak political sentsü ka keta lir kechiyong August 2022 nung parnok indang social media post ka nung Chief Minister Biren Singh den ajurutepeba noksa ka sayua liasü. Maneni yaküm September ita Manipur chuba Leishemba Sanajaoba indang Facebook post ka nunga Arambai Tenggol züngsemtemi par kidang tezüngzüktep agiba sayua liasü. Arambai Tenggol züngsemtemi Meitei sobaliba aser Kangleipak ta ajaba alemli Meitei chuba yimli indang jembir aser Sanamahism tamangba yimsü kümzükka ayutsü ajungmesor. Chief Minister Biren Singh-i anir Manipur sorkari tensa süngjemtsü aser yimjung bener arutsü atema inyaker tabo ashir saka külen kin ka tsütsü dak tejak shir inyaksangshiba aser talisa Arambai Tenggol-i ayongba senden adenba dang masü saka tezüngzüktep nung sign asüba ajangabo tensa mesüngjemtettsü aser yimjung bener marutettsü ama bilemer. Indian Constitution kübok akümba state sorkar kati tiyongtsü nung inyaksangshitsüla aser state nung kin mesüra nisung temeyoktep aliba ajak asoshi bilema tiyongtsü nung inyaksüla kechiyong ibaji Indian Constitution nung laeta lir. Ajisüaka Manipur nung state sorkari iba teinyaktsüji meinyaker anungji tangtangbo yimjung aser tesünep mengutettsü ama bilemer. Ajak dang tebilemetsü tulutibaji Arambai Tenggol yagi state sorkar atsüngdoker ketdangsüra Manipur nung dang masü saka Nagaland dena temeket aliba state tem nunga timtem-tuoshi ajurutsü ana nung dang lir. Anungji Nagaland-i anir tanüngba Northeast state temi Manipur tensa süngjemtsü aser tesüiba ama yimjung alitsü atema mapa inyaksü mapang tongja tongogo.

OLEMSABANG

DAWID LIJAKJANG ASER GOLIAT NOKLANGNOK

~ Mr. Lanurenba, Source: Khristarluyimer

Alima nung alir meimchir ajak nem asen Teyanglur Tsüngremi iba lima nung asen taküm kechi koma lia aotsü aser asen taginüba, tejangraba asen sasa aseni mulungba lenmang nung jajaa lia aotsü temeten agütsü. Aser yamaji tamangertem aiak Tsüngremi mulungba Pa lenmang nung Tsüngrem temoatsütem agia Pa lenisüba nung jaja arudagi, saka ano aika Pa temeim mangatetti aseni mulungba nung, alima shi azü jangraba tsütsü, temesepba yi marok amer, drugs koba nisung ka taküm asoshi kanga dang lendong aketba chiyongtsü aser Tsüngremi anemba chiyongtsü lir, item den tembar yimer, medemer, adianu, kiyong kidanger aser kija kibong, lokti indang nüngsenbangsen jembia, tiazü kuli abenba temeli tener, nükmerem agi sünger aliba takümtem aika lir, koba Tsüngrem memeimba aser Tsüngrem anema inyakba mapa tamajungtem lir, koba ajanga asen kija kibong aser lokti tamakok, timtem aser telongjem raksadaktsür.

Kodang agüja aliba Lai tekongtemji reprangdangdir idakji asenoki Dawid-i amba mechi, shikep juli aser lijakjang aser Goliat-i amba noklangnok aser rara sobutsü indang shia angutsü. Dawid tanur ka dang aser tangar ama tsükchir den raratsü aso ajen temsüa aliba taküm masü, saka kanga ajemalu aser Tsüngrem dak tamang akaba taküam ka liasü. Kodang pa Goliat den raratsü asoshi apuso, iba mapang nungji pa ket nung mechi ka aser lung yokba shikep juli ka liasü aser pa kodang ayong atung pai long tesüsü pungo shima aru aser pai Tsüngremi ashiba anga tamang agi Filistia nung aso tulu Goliat den raratsü ao.

Ano külen kodang Filistia nungba walunir Goliat takmji reprangdangdir, kanga dang aso tulu, rara nung mongin, tekolak nungi temesüla tashi rara sobutsü semer, jong aser noklang nok amer kanga dang merena ola tulu adoka nokdaka aliba asenoki Laishiba otsü nungji angur.

Ni iba otsü ajanga asenok ayongzükünbaji, Goliat koba rara sobutsü semer, jong, noklang nok amer aliba jagi pa taküm kümzük tet asü mekümzük tet ta asüngdangner. Ano külen Dawid shiba ket nung mechi, shikep aser lung pungo ama liasü iba jagi pa taküm kümzük asü mekümzük ta asüngdangner. Goliath yamaji tetsübutsüka sübur liakasa pa Dawid-i ayung nungi shima aruba lung tila ka süngla menokdangtet pa ali nung atashia laoba angur, aser ano agüja aliba Lai tekongji reprangdangra idakji asenoki Dawid Goliat dangi asema oa Goliat-i bena aliba pa indang noklang nok agi pa kolak tangzükka pa taküm idakji Dawid- tepsetba angur. Süra asenoka aseni tang kechi mapa, kechi yimya ka aser asen taküm asoshi Tsüngremi asen nem asen mulungba anung alitsü temeten agüja aliba jagi kechi komaka shima asen taküm lia odar? Aseni shimba nükmerem, temeli telili, nüktabangta shisatsü, anemsü molungsentsü, ochi mashi, temesepba yi moko item jagi asen taküm aser kibong kümzükdima? Goliat ama tanü ajung asoshi tang bilema item sobusolemtsü semoker aliba jagi asen taküm meyanglutettsü aser mekümzüktsü, saka koba pei noklang nok agi pei kolak tangzük, yamaji asen taküma aseni item temenen sobutsü semer alibba jagi asen taküm, kibong aser lokti tepseter aser tepsettsü ta angatetdi.


Kodang asenok Dawid taküm aser pai ama aliba shikep aser lijakjangji reprangdangdir aser otsüji züngdir, item pai ama alibattem jagi pa taküm mekümzükka aser tsükchir makokama? Süra asenia aseni ama aliba asen sempet, yimya aser tamangji koma lir? Item jagi asen taküm tanela tongpang nungi kümzükker mekümzükker aser akoker makoker asenoki ken jungjunga bilemdangdi. Galatia 5:22-23 nung shia aliba ama item tanela süngjangtemji asen sobutsü kümer asen taküm lia aotsü merangdi arung.

Asenoki Goliat ama merenmerena sobur liaka asen taküm sempet yimyaji alima asoshi dang amshia lira iba jagi asen taküm, Kibong kodanga kümzükka meyutettsü aser tanelar tongpangji makoktsü, saka kodang asenoki tila küma, ajemalua Tsüngrem sentong angatetta asen takümji lia odir Dawidi amba shikep aser lijakjang kobai pa taküm kümzük aser tsükchir koktet yamaji asen taküm nunga takok aser Tsüngremer temoatsü aser Pa lenisüba nung teti asen taküm lia aotsü.

Süra aseni asen taküm len anitsü asoshi koba shimtsü... Dawid lijakjang mesüra Goliat noklang nok? Asenoki sarasadema shimdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

World War III liaka Khrista osang prokba manentsü: John Piper



Pastor John Piper

January 30, 2024: America nunger Baptist Laishir aser pastor John Piper-i, tang Europe anüdoklen aser Middle East nung rara ajanga World War III tenzükyonga Khristai tenyaba wadang inyakba manentsü, ta metetdaksü.

"Ask Pastor John" podcast nung nisung ka tenüing agi, Malcolm-i alima tesem balala nung raraba dak sendakba tasüngdangba kar asüngdanga liasü.

Malcolm-i, "Alima nung linük tulutem nung sepaitem amoi oa aliba nungi saaker ama reprangteter. Tang alima nung tensa tamajungba akümba mapang nung rara aser raraba indang olulu osang aika angashir. Alima nung raraba dak sendakba nung tanela tsütsülen nungi nü tangatetba kechi?" ta asüngdang.

Malcolm-isa, "Laishiba nungi nai nüsasa koma tesünep angur. Alima tensa tamajungba akümer aser World War III indang kanga bulua jembir; nü tebilemba kechi?. Raraba mapang aser raraba olulu aliba mapang nung alima nung mission mapa koma asütsü?" ta asüngdanga liasü.

Item tasüngdangba langzüa Pastor Piper-i, "Item ama rara aser raraba olulu aliba mapang nung tamanger karibo Khristai tenyaba wadang sendoktsüa akok mesüra karibo tenyaba wadang ajema inyaktsüa akok. Yisu-i Pa nütsüngtem dang alima kin ajak dangi oa nütsüng kümdaktsütsü atema tuyua lir," ta ashi.

Piper-i Mathi 24:5-14 nung ajemdaker Yisu Khristai tatembang anogo nung rara aser raraba olulu alitsü aser kin ajak dang Kibuba yimli osangtajung sangdongtsü, ta shia aliba indang metetdaksü.

"Iba tesendaktep ya tongmelang 'rara aser raraba olulu' ajanga Tsüngremer mission manentsü. Linüki linük anema apusoyonga iba mission tembanga inyaktsü," ta Piper-i ashi.

"Rara aser raraba olulu ajanga mission mapa nung tetsükdaktsü agütsüiyonga Yisu

Khristai jembiba oji atangji ataloktsü. Rara aser raraba olulu ajanga alima nung Khrista osangtajung sangdongba menokdangtetsü," ta paisa metetdaksü.

Akhi puti otsütem nung ajemdaker Piper-i, Civil War mapang nung Europe aser United States nung missionary organizations aika tenteta liasü, ta ashi.

Paisa, alima nung rara aliba mapang nung evangelistic organizations aika tentetogo aser revival-a adokogo, ta metetdaksü.

Piper-i, Interdenominational Foreign Mission Association ya World War I mapang nung tenteta liasü, Wycliffe Bible Translators ya World War II mapang nung tentet aser World Evangelical Alliance den Campus Crusade for Christ ya Korean War mapang tenzüka

liasü, ta ashi.

"Iba ya ochi tilaka dang lir. Tsüngremi alima nung mission tembanga inyaktsü nangzüka alibaji rara aser raraba olulu ajanga menokdangtetsü," ta Piper-i ashi.

"Anungji Malcolm, kü melungjang tashi itdaktsütsü aser tenyaba wadang inyaktsü atema Tsüngremi kü taküm nung mapa inyaker," ta Piper-i ashi.

Tang Middle East nung rara tamajungba akümer; tawa United States-ia Yemen nung Iran-i pusemba Houthi telungpurtem amak tenzüko go aser Lebanon nung aliba Hezbollah telokia missile amshia Israel amaker.

Amongnü (January 28) Syria arrtsülen Jordan nung drone amshia amakba mapang nung US sepai asem asü aser 34 yirügo.

Bangladesh nung America nunger missionary, Frank Quinlivan süogo



Missionary Frank Quinlivan

January 30, 2024: American Holy Cross nungi missionary kati küm aika Bangladesh nung tenzüka aruba sülen arrshi küm 81 nung süogo.

America nunger missionary, Frank Quinlivan Bangladesh yimtiba, Dhaka nung aliba hospital ka nung treatment tagidak mapang January 28 nü asü.

Quinlivan 1943 küm August 4 nü Chicago, Illinois, United States nung aso aser kibong nung tanur asem rongnung pa tambusang liasü.

1957 küm nungi pa Holy Cross seminary ka nung azüing aser school den college-a Illinois

asur Washington D.C nung aliba Holy Cross indang rejutem nungsa aziung.

Pa 1970 küm April 4 nü ordain asüba sülen 1970 nungi 1979 küm tashi Fort Wayne-South Bend nung aliba Diocese indang Justice & Peace Commission nung inyaker.

1979 küm pa Bangladesh-i aoba sülen Dhaka Archdiocese kübok Arogo asem nung inyaker aser 1985 küm tashi and Holy Cross novitiate inyaka liasü.

1985 küm pa dang US-i arutsü metetdaksüba sülen 1985 küm nungi 1991 küm tashi Colorado nung Holy Cross Novitiate inyaker aser 1991 küm

ANO GO ABEN TSÜNGREM DEN

Ochi jagi na nüji kümdaktsütsü

"Aser nai ochiji metettsü, aser ochi jagi na nüji kümdaktsütsü." Yohan 8:32.

Tsüngremer ochibai kodanga na menokdang; iba yagi na teti nüji kümdaktsür! Na tasü meiti lir asü? Temenen kar madak takok mengui lir asü? Lendong aketba chiyong kar lar küma lir asü? Tsüngrem indang ochibai na nüji kümdaktsütsü ta mangateti alitsü akok.

Ne jakdang tayongzüka den ajuruteptsü na tasü meiti lira, Filipi 4:13 nungi tasü aittsü angazükang: "Khrista shibai ni tasü itdaktsür Pa ajanga ni ajak inyaktsü akok." Tensa ajanga nai tamakok ngua lira, Rom 8:28 nung shia aliba nung azüitang. "Tsüngrem meimertem asoshi mapa ajak tajung asoshi inyaker." Na temenen kar lar küma lira 1 Yohan 1:9 ochiji ne taküm agi inyakang, koba nung nai temenen nangzükra, memeshiba ajak nungi na merüktetdaksütsü Tsüngrem tamang katetta lir. Item ajak ne taküm nung Tanela Temeshi-i inyaktsü ataa lir.

Ne taküm nung Tsüngrem ochibai mapa inyakba metettsübaji ano mapa ka lir. Tsüngremer ochibaji nai magizükra aser mamangra ochi jagi ne taküm nung mapa meinyaktsü. Tangar taküm nung mapa meinyaktsü. Tangar taküm nung Tsüngrem aini mapa inyakba nai angashia alitsü akok. Saka item ochibaji ne taküm nung inyaktsü nai Tsüngrem dang melaa lir ma? Tanü nü taküm nung ochi inyaktsü Pa dang asüngdangang.

nungi 1994 küm tashi Assistant ta ashi.

provincial inyaker.

Pa maneni 1994 küm Bangladesh-i aoba sülen Oriental Institute nung inyaker aser 1994 nungi 2005 tashi Sreemangal nung aliba St. Joseph Arogo nung inyaker.

Pa Arogo nung inyakba mapang nung pai sensakertem aser Khristantem atema schools aser boarding hostels aika lapokja liasü.

Journalist Mintu Deshwara-i, "Nisung karbo akümüli piyong tangar ajungkettsütsü atema alir. Putir Frank Quinlivan-ia yamaji liogo," ta ashi.

Paisa, "Ni pa majuru asübo ozü nüburtem ama ni-a süngolu nung aayanger ka dang süla. Ni nashi-nüker ka liasü, ajisiaka pai (Quinlivan) ni kangshia school ka nung züingdaksüba ajanga kü taküm melenshi. Ni iba missionary nem akhüm agütsür. Pai aochia meimba aser yariba atema nisungtemi pa teti bilemtettsü," ta ashi.

Sreemangal nung tanur asem tebu kati, "Putir Frank ya süngolu nung inyakertem atema Tsüngrem ka ama liasü. Nübur ajak atema pa dak teimla liasü,"

Quinlivan-i Dhaka nung

Arogo indang shisaliok reju aika nung inyaker aser 2006 nungi 2012 küm tashi Bangladesh nung Holy Cross provincial superior aküm. 2013 küm nungi pa Kumudini Hospital nung Chaplain inyaker, Gazipur nung aliba Holy Cross Retreat Center nung Director inyaker, Moreau Seminary nung rector inyaker aser Notre Dame University nung development director inyaker. Seminary aser University napronglaji Dhaka nung lir.

Bangladesh nung Holy Cross putir, Subroto Boniface Tolentino-i, Quinlivan-i nüburtem kanga meimadok, ibayongji pa tenzüka wadang nungi anisüngzükyonga pai US-i meyipa mao aser pa tasümgang Bangladesh nung dang aremstü mepishia liasü, ta metetdaksü.

January 29 anepdang Dhaka nung aliba Holy Rosary Church nung nisung aika adenshia pa nem akhüm agütsüba sülen asüpila sentong agia liasü.

Pa tasümgang Dhaka anasa aliba Gazipur district kübok Holy Cross priest cemetery nung remtsügo.

AO OSHI ANGAZÜKDAK:
TANÜ ANGAZÜKTSÜBA OJANG



Shisanü

(n) shisatsü talubosa angudak (fount of knowledge)

* Ajak atema Laishiba ya shisanü lir.

Shisarajem

(n) temulung aser tokolok nung bilema asadangba (Philosophy)

* Kaketshir atema shisarajem mapa ya tongtibang lir.

OLONG PAITEP # 6682

1	2	3	4	5
		6	7	
8				
			9	
	10			
11				12
		13		14
15				
16			17	

TIPLÉN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Ameha - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashitem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6681 TELANGZÜBA

TIPLÉN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

NAI-A YA METETTER MA



TRUMP'S LAMBO

Barrett-Jackson indang Scottsdale auction nung taoba ex-President Donald Trump meyong asüba Lamborghini Diablo VT Roadster gari ka \$1.1 million agi auction süogo.

Donald Trump-i 1997 nung iba gari order asü aser driver side door nung "Donald Trump 1997 Diablo" plaque enoka lir. Pai iba gari ya 2002 küm tom tashi ayu aser iba sülen nisung anati dang iba gari alia kibur kümogo. Diablo VT Roadster ya 24,836 km (15,432 miles) dang jajaogo aser tan auction nung \$1.1 million agi yokdokogo.

Mizo nunger teloki Amit Shah mesüka yanglur rongdok



Aizawl, January 30, 2024
(Agencies): Centre-i Indo-Myanmar arrtsü atsüdangtsü aser Free Movement Regime (FMR) agientsü lemtetba anema Chin-Kuki-Mizo-Zomi telok kati lungkak aitogo. India, Bangladesh aser Myanmar nung Mizo teloki Union Home Minister Amit Shah mesüka yanglur rongdok. Aizawl nung amenoka aliba Zo Re-unification Organisation (ZORO) ajanga Zo nunger ajak külemi longjemshitsü atema inyaker. Hombarnü Aizawl nung parnok Chin-Lushai

conference alidang parnok administrative unit ka kübok aittsü indang jembi aser international border atsüdangtsüba den FMR agientsüba anema jembi. Centre-i Indo-Myanmar arrtsü atsüdanga aser FMR agiena Zo nunger lemdangtsü meranger, ta ZORO-i ashi. Tawa tu Amit Shah-i Indo-Myanmar arrtsü atsüdangtsü aser Myanmar den FMR agientsü osang metetdaksü. Mizoram sorkar aser telok aikati Centre lemtet magizüker saka tawa tu Chief Minister Lalduhoma-i "Centre ajanga iba

lemtet ya mapa kuma inyakra Mizoram sorkar dak noktangtsü tashi mali" ta shiogo. India-i Myanmar den kilometre 1,643 agi arrtsütepa lir. Arrtsüji Arunachal Pradesh (520km), Nagaland (215km), Manipur (398km) aser Mizoram (510km) lir. ZORO mungdang nung Zo nunger ajak administrative unit ka kübok tanaben longjemshitsü bangjemtep. Parnoki United Nations Organisation (UNO) dangi aotsü aser Zo kintem ajak administrative unit ka kübok dendaktsütsü lemtet.

Arunachal CM-i China den arrtsü anasa mapatong aika lapoktsü

Itanagar, January 30, 2024
(Agencies): China-i Arunachal Pradesh madak kibur akümba mapang ka nung Chief Minister Pema Khandu-i Mongulbarnü China aser Myanmar den arrtsü anasa aliba Anjaw district nung infrastructure projects aika lapoktsüogo. Tanü CM Khandu-i Hawaii town nung Jawahar Navodaya Vidyalaya, Hayuliang town nung VKV school building aser arrtsü lenmang nung aputem den tanga mapatong aika lapoktsü. Iba sentong nung Arunachal East MP Tapir Gao, Anjaw MLA Dasanglu Pul, taoba CM asür

Kalikho Pul kinungtsü, Namsai MLA Zignu Namchoom, Dirang MLA Phurpha Tsering aser tangartem aden. "State ajungalen childhood care centres timi ketdangtsütsü atema onoki bilemer aser tanurtem tila asüdang nungi shisaliok shitak agütsütsüla" ta CM Khandu-i ashi. Hawaii nung JNV school ya ali acre 22 nung yanglua lir aser iba temelenshi tajung bentsür arutsü. Centre sorkari state ajungalen education infrastructure ajungketba atema pelar, ta pai ashi. Chief Minister-isa Hayuliang

nungi Manchal CO HQ road nung 35-meter long steel girder RCC bridge ka lapoktsü. Arunachal Pradesh nung Anjaw district ya kanga tongtipang lir aser iba district indang headquarters ji Hawaii nung lir. Iba district yagi China aser Myanmar den arrtsütepa lir. 1962 war mapang Anjaw kübok tesem kar China-i atsünga agia liasü. Iba alinük ya ashishitepa aruba agi Anjaw district nung India sepaitem teti alir. 2020 China-India raradang iba tesem nung sepa talila mapa lezmükja liasü.

Telok balala nungi lennir 200 temai AGP nung aden

Guwahati, January 30, 2024
(Agencies): Hombarnü Assam nung political party balala nungi ketdangpur 200 temai Asom Gana Parishad (AGP) nung denogo. AGP headquarters, Guwahati nung agiba sentong nung Assam Congress General Secretary Apurba Kumar Bhattacharjee, Asom Jatiya Parishad Central Secretary Paban Saikia, Trinamool Congress nungi Mihir

Pal aser Golghat District Committee AJP President Ajit Gogoi nunger aden. Sentong nungsa AGP President Atul Bora, AGP Working President Keshab Mahanta, Central Committee Vice-President, General Secretary aser tanga ketdangpurtem aden. Deobarnü Bharatiya Janata Party (BJP) nunga lennir aika

adenba ajanga jenjang tajungba kümogo. Parnok rongnung taoba Assam Youth Congress president Ankita Dutta, Khumtai constituency nungi taoba Congress MLA Bismita Gogoi, taoba All Assam Students' Union (AASU) president Dipanka Kumar Nath aser taoba AASU vice-president Prakash Das nungertem dena lir.



Mongulbarnü Manipur-Myanmar arrtsü anasa Kamjong district kübok General Area Kangpat Centre nung ozüng alema kozüjang bener aruba osang angashir mita atadang Rs 3.93 Crores alangba kozüjang bosta 328 apu. Bostatem nung kozüjang 32.8 tons bena liasü aser iba dak sendakba nung nisung pezü apu.



October 7 nü Hamas puri Israel amakba mapang asüba aser Gaza Strip nung raraba mapang asüba Israel nungertem indang noksa Jerusalem, Israel kübok National Library nung screer tulu ka nung sayua aliba tesemdangertem repringba noksa nung angur.

OFFICE OF THE
CHUCHUYIMLANG SENSO MUNG DANG
 P.O. CHUCHUYIMLANG - 798614

TENÜNGSANG AGÜTSÜR

DR. SENTITULA IFS, Divisional Forest Officer, Mokochung-i 26th January 2024 anogo nung **Governor's Gold Medal Award** anguba asoshi Chuchuyimlang Senso Mungdang-i la nem konang aser tetushi agütsür.

Tarutsü nung la wadang aser mapa nung Tsüngremi maneni moajangma.

Sd/- **S.T. Nokdang Lkr.** President, CSM
 Sd/- **S. Temsu Pongen** General Secretary, CSM

ALI AYOKER
 AT AOYIMKUM
 Rs. 250 per sq. feet
 Two minutes walk from Futsal ground, Indisen
 Contact: 9856 278136

Vietnam & Philippines SCS atema tenangzüktepba yanglu

Manila, Aenjeti/January 30 (Agencies): Vietnam aser Philippines nati South China Sea nung maritime security dak sendakba nung sendaktepa inyaksangshitsü atema tenangzüktepba ka yangluogo. SCS nung kümshia USD trillion 3 shishilembar, koba tuluba ka China-i parnok meyong ta shia arudar.

Tir Ferdinand Marcos Jr-i Hanoi semdangba mapang iba tenangzüktepba yanglua liasü aser iba ajanga mangatettep aliba tzüym nung lendong balala madokdaksüi nokdanga ayutsü aser lendong balala adokba mapang linük ana coastguard tem longjemer inyakba angutsü.

South China Sea ya China, Philippines aser tanga linüktem arrtsü dak sendakba nung mangatettep adokba teyongtsü lir. China-i tzüym ya tuluba ka parnok meyong ta ashir aser kasa mapang nung Philippines,

Vietnam aser tanga linüktema asetkong, islets, reefs aser shoals tem parnok meyong ta shia arudar.

United States den sendaka aliba Philippines aser China na tsüingda tawa tzüym nung arrtsü dak sendakba nung mangatettep adoker lir. Taoba küm tatemlen Whitsun Reef-i sepaitem aika yokba atema Philippines-i China aija liasü. Kasa mapang nung China-ia Second Thomas Shoal waterway nung parnok rongshiba atema Philippines aitsüogo.

Iba ita tetenzüklen US aser Philippines nati joint exercise kar ayongzüka agiba mapang China-i (kasa tzüym) South China Sea nung military drills ayongzüka agiogo.

Tzüym nung aiben mangatettep adokba ajanga mepetmesü ya prokshia aotsü akok ta tsübuu bilemer.

Vietnam aser Philippines

nati coastguards atema tenangzüktepba ana; "incident prevention in the South China Sea" aser "maritime cooperation" yangluogo, ta Vietnam nunger ketdangsür kati ashi.

Iba tenangzüktepba yangluba ajanga Beijing tezü adanger.

Marcos-i, Southeast Asia nung Vietnam kija Philippines indang strategic partner lir ta ashiba den tzüym nung tesendaktep ya linük ana tesendaktep tamendakdak lir, ta shisem.

Kasa mapang nung Vietnam Ato Kilonser Pham Minh Chinh-i ashiba agi, Marcos-i linük semdangba ajanga tesendaktep akangshiba nung teyari agütsüogo. "Alima aser regional tensa kanga kara tamajungba aser tebenjaba küma odar, anungji onok tali longjemer inyaksü nüngdaker," ta pai ashi.

US-i Venezuela nem tenokdangba agütsüshi

Washington, Aenjeti/January 30 (Agencies): Opposition party nungi tir mapa abentsü imla alir ka disqualify sütsüba linük supreme court-i agüzükba sülen United States-i Venezuela nem mining sector dak sendakba nung tenokdangba agütsüshiogo.

Venezuela indang state meyong mining sector den shishilembar aliba US company tem dang February 13 nü tashi nungbo inyakyim ajak tembanga inyaksü atema tetuyuba agütsüogo, ta US Treasury indang Office of Foreign Assets Control-i ashi.

US-i Hopta tatem Venezuela dang taoba küm 2024 election dak sendakba nung tenangzüktepba ka yangluba sülen tenokdangba kar agintsü aliba tanaben benokshitsü akok ta tekümdaksü metetdaksür liasü.

Tir Nicolas Maduro-i aniba sorkar den kanga junga sendaktepa Venezuela indang Supreme Court-i Hokolbarnü opposition lenir Maria Corina Machado nem küm 15 atema tenokdangba agütsüba agizüka liasü aser la melentsüpur rongnung anaben tashi tir candidate Henrique Capriles-a election nung tokteptsü atema temsüa mali ta jangjatsüogo.

Machado-i Hombarnü la tir menden atema tokteptsü asoshi taoba hopta okadak ajanga tenokdangba agütsüba ya ozüing alema lir aser la maneni tokteptsü ta tenangzükba agütsüba den tang yimsüsü süa aliba sorkari election nung la den tokteptsü tsübur ta ashi.

Barbados nung taoba küm Venezuela opposition den 2024 election kecha tetsükdaksü makai sadem sadema international observer tem dena election agitsü tenangzüktepba ka yangluba sülen Washington aser tanga sorkar den tesendaktep yanglushitsü Maduro-i aniba sorkar timla liasü.

Iba tenangzüktepba yangluba sülen Washington-i tenokdangba agütsür aliba kar aginja US nung amenoker aliba Chevron nem limited oil extraction tenzükshitsü temelaba agütsü aser tepuokertema melentepa

liasü.

Hombarnü House otongdar John Kirby-i ashiba agi, Maduro-i aniba sorkari Barbados nung nangzüktepba ama minyak.

"Anungji onok ket nung tenokdangba agütsüshi atema lenmang sadema lapoka lir," ta otongdar yagi ashi.

Ozüing yanglur Jorge Rodriguez shiba opposition den sensaksemba mapang Maduro indang team lenir lir pai, US Treasury-i telemtetba magi tsüingda ashiba agi, Washington-i jenjang tesashi kar danga agira Venezuela-i telanzüba tesashi agütsütsü.

Arishi küm 56 tain Machado ya taoba mapang ozüing yanglur ka liasü aser lai October ita opposition indang independently-run presidential primary election nung vote silem 90 dak tema ngua takok ngua liasü.

June ita la election nung tokteptsü atema sangdonger anogo ishika dang lir sorkari la nem küm 15 atema tenokdangba agütsü, ajisüaka lai maneni opposition party election nung shilem agi takok tajung ngua liasü.

Machado-i küm talangka sorkar den toktepa arudar aser la primary nung shilem agitsü asoshi maongka ngutetogo, kechiyong iba ya Venezuela indang electoral authorities den sendaka maliba commission kati ayongzüka agia liasü.

Machado-i election atema nüboyima senzüba tepeyong, la nem tenokdangba agütsüba indang official shiti ka danga magütsü ta shia aruogo.

December ita Machado-i okdak ken o ka benok aser ashiba agi, la nem tenokdangba agütsüba ya tim masü aser yimden yimsütsüba tsütsü la temeden kümzüka toktsütsü atema temepshiba ka benoka liasü.

Ajisüaka iba melena okadaki la nem tenokdangba agütsür aliba ya agizüka liasü aser ashiba agi la ochi mashi inyakyim nung densema liasü aser saru shitak magütsü. Maneni lai US nem taoba küm 10 tashi rongsenketzüng nung tenokdangba agütsür aliba benokshidaksütsü atema jenjang agir ta shia la aija liasü.

Israel 'hit squad'-i West Bank mozüki ka nung nisung 3 tepset

Jerusalem, Aenjeti/January 30 (Agencies): Israel nunger sepaitemi West Bank kübok Jenin yimti nung mozüki ka telung nung Palestine nunger asem tepsetogo.

Palestine nunger asem ya Ibn Sina Hospital nung mejanga aliba mapang undercover operatives temi tepseta liasü, ta Palestinian Ministry of Health aser Israel army-i Mongolbarnü metetdaksü.

"Tanep Jenin nung Ibn Sina Hospital-i ia Israel nunger sepaitemi lanur asem tepsetogo," ta Ramallah nung Health Ministry-i ashi.

Israel army-i ashiba agi, parnoki item nisungtem tepsetogo, shirnok mozükidang atsüka liasü aser

parnok ya Hamas "terrorist cell" züingsemtem liasü.

"Parnok asem rongnung ka ket nungi prangbong ka ngutetogo, koba sepaitemi puogo," ta army-isa shisem.

Israel army-i ashiba agi, parnok asem rongnung ka tawa kiralongrar inyakyim ajungketba nung densema liasü aser pa ya iba mozükidang atsüka liasü.

Hospital director Naji Nazzal-i AFP news agency dang ashiba agi, Israel nunger sepaitem ishika meibanger aita item nisungtem tepseta liasü.

Parnoki silencers inoker prangbongtem amshia liasü, ta paisa shisem.

Official Palestinian news agency Wafa-i asür asem ya Muhammad Jalannah,

Muhammad Ayman Ghazawi aser Basel Ayman Ghazawi nunger liasü ta metetdaksüogo.

Online nung prokshiba security camera footage nung tetsür süoshi semer aliba sepai asem medical staff ama subor aliba sepai ana densema undercover sepai tersür ta prangbong bener mozüki corridor nung asem aoba nguogo.

Gaza nung rara tenzükba sülen Israel nunger sepaitemi West Bank anogoshia ama maka nisungtem pudendar.

Rara tenzükter tang tashi nung Israel nunger 1,140 shi tepsetba den nisung 250 purogo aser Israel-i Gaza amakba mapang Palestine nunger 26,637 shi tepsetogo aser nisung 65,387 yirur lir.

7th Mokokchung 'AutoX & Up Hill Climb 2024' sentong tenzükogo



Mokokchung DRDA Project Director, Toshimongla Kichu-i Süngratsü Sports Complex nung 7th Mokokchung AutoX & Up Hill Climb sentong lapoktsüdang tangokba noksa nung angur. Mokokchung, 30th January, 2024.

Mokokchung, Anjeti/January 30 (TYO): Ajaki yongyaseta ataba 7 buba gari asemtep tetoktepba Mokokchung AutoX & Up Hill Climb 2024 sentong Jan 30 nü Mokokchung DRDA Project Director, Toshimongla Kichu-i Süngratsü Sports Complex nung meraketa tenzüksüogo. Iba sentong ya Adventure and Motorsports Association Mokokchung (AMAM)-i ayongzüka akar.

Iba sentong nung state asem - Nagaland, Assam aser Meghalaya nungi kija aser telok balala - AMAM, Nagaland Adventure Club, Street King Club Dimapur, Team RD Dimapur, Kohima Adventure Motorsport Club, Nagaland 4x4 Kohima, Spearhead Motorsports Club aser Team Shillong amala nungi meyongertemi shilem agidar. Tanü Autocross telemsa 3 asayaogo aser item nungji

parnok 44-i shilem agi.

Iba sentong lapokja special guest, Toshimongla-i mapang tatsüka agia jembidang, asaya koba südir süaka takok ngua tejakleni awa aotsü asoshi tazüokba den saisabonger kati mapang ajak nung libaliro tajung süa tangar asoshi tanüdangtsü kaka asütsü ayongzüka. Iba ama sentong akaba ajanga metapenzüba luyim tsütsü ajungkettsür aser state balala nungi kati ka den metepetpa temba yimteper aser tesendaktep akangshir, ta laisa shisem.

January 31 nü 'Up Hill Climb' sentong Mokokchung yim lushi nung aliba Meraküm Tzüin Resort nung akatsü renema lir. Up Hill Climb atema gari lenmang balaka yanglua lir. Iba Resort ya Mokokchung nungi tatsüka pilar Yimchalu lenmang anasa lir. BJP YUVA Mokokchung district Tir, Intikümzüka Imsong-i iba

sentong shibangtsütsü. AutoX aser Up Hill Climb tetoktepba anaprong nung takoker nem senpet sen den kuli kaket senpettsütsü.

Autocross telemsa asem

(3) nung takokertem:

I. AUTOCROSS SUV

1st : Among Jamir,
Mapang - 02:33.38

2nd: Kamlish Das,
Mapang: 02:33.81

3rd : Ana Solo,
Mapang: 02:34.57

II. AUTOCROSS BELOW 1300CC

1st : Thkziku, Mapang: 02:26.43

2nd: Alem I. Jamir,
Mapang: 02: 28.25

3rd : Kima Jamir,
Mapang: 02:29.43

III. AUTOCROSS OPEN

1st : Thkziku, Mapang: 02:23.41

2nd: Alem I. Jamir,
Mapang: 02:26.90

3rd : Hokavi Kiba,
Mapang: 02:27.25

Arr atsütepba tetoktepba Chakhesang nungeri kokogo



Mezüngbuba Inter-Ethnic Community Tug Of War Championship akokba Chakhesang team tangokba noksa nung angur.

Dimapur, Aenjeti/January 30 (TYO): Mezüngbuba Inter-Ethnic Community Tug Of War Championship Chakhesang nungeri kokogo. Final nung parnoki Zeliang team koka liasü, koba Mongolbarnü DDSC stadium nung asayaogo.

Arr atsütepba nung takok anguba team nem senpet sen lakh 1 aser tanabuba jenjang nung tembangba team nem senpet sen 30,000 agütsüogo.

Advisor for Youth Resources & Sports, Nagaland S Keoshu Yimchunger shiba iba sentong asoshi alakteta jaoker

liasü, pai state aser centre sorkar napronglai linük nung saisapong ajungkettsü atema kanga tongtibangsüa inyakdar, ta ashi.

Asaya ya shilem agitsü atema dang masayatsüla saka bendanga agüja asayatsüla kechiyong tanü lima nung asaya ya kanga dang tongtibang profession ka kümogo aser asayartemi sen aika aazükteter, ta paisa shisem.

Maneni pai, ama oya aliba asaya ka tang mezügbuba state nung ayongzüka asayaba atema asayamung ayongertem nem

tenüngsang agütsü. Paisa, asayamung ayongertem dang iba asaya ajungkettsü atema Nagaland Olympic Association nung züngoksemtü ajungshi.

Sentong nung Major General, Vikas Lakhera, Sena Medal, IGAR North, Kohima-ia o tatsüka jembia liasü.

Iba tetoktepba nung ajak senteper team 16-i shilem agia liasü. Iba asyamung ya Western Chakhesang Youth Organization (WCYO) aser Nagaland Tug of War Association (NToWA) na longjemer kanga takok ngua ayongzüka asayaogo.

Küm 6 sülen WTA Mumbai Open asayatsü

Aenjeti/January 30, 2024

(Agencies): Küm trok sülen Mumbai Open Tennis Championships Maharashtra State Lawn Tennis Association (MSLTA) aser Cricket Club of India (CCI) nati ayongzüka asayatsü renema lir. Taküm iba asayamung nung linük 31 nungi asayartemi shilem agiba angutsü.

Tang agi tasembenbuba WTA Mumbai Open ayongzüko aser taoba mapang kija asaya akokertem rongnung world No 2 Aryna Sabalenka (2017) aser Thailand nung asayar Luksika Kumkhum (2018) nung aser densesma lir.

Taküm iba asayamung kija asaya nung top 100 nung aliba asayar asem aser tarep asaya nung top 100 nung aliba asayar trok-i shilem agiba angutsü, koba WTA \$125K series nung shilem ka lir.

Iba asayamung ya Cricket Club of India nung tawa yangluba tennis court tem nung asayatsü. Asayamung atema qualifying asayatem February 3 aser 4 nü asayatsü aser main draw February 5 nü nungi tenzüka asayatsü. Final asaya ya February 11 nü asayatsü.

2016 US Open girls singles champion aser world No. 82 America tsür Kayla Day-i anir asayar 32 iba asayamung nung shilem agitsü. La den WTA Tour kija asaya asem tashi koker aliba Japan tsür Nao Hibino aser taoba mapang French Open semifinalist aser world No. 97 asayar Tamara Zidasek nata densesma lir.

Tanga asayartem rongnung America tsür Katie Volynets, Australian tsür Arina Rodionova aser Kimberly Birrell aser Brazil tsür Laura Pigossi nung aser densesma lir.

Arishi küm 16 tain Russia tsür Alina Korneeva, shiba taoba küm junior asaya nung temaba jenjang nung liasü aser 2024 Australian Open tetsür kija asaya tasembuba round tonga asayaogo, la-a Mumbai nung asayaba angutsü.

Maneni India tsürtem rongnung temaba jenjang nung aliba tarep Prarthana Thombare aser Dutch tsür Arianne Hartono nati iba asayamung tarep asaya nung asayatsü atema indang indanga iogo. Iba asayamung atema wild cards asayartem taruba anogo ishika tsüingda sangdongtsü imlar.

Crystal Palace-i defender Daniel Munoz alizükogo

Aenjeti/January 30, 2024

(Agencies): Crystal Palace-i Genk nungi Colombia nung right-back Daniel Munoz alizükogo.

Pa den küm asem atema euro million 8 alang tenangzüktepba ka yangluogo aser maneni tenangzüktepba ya küm ka atsülangtsü asoshi lenmang sadema lapoka yuogo.

Arishi küm 27 tain asayar ya 2020 küm Belgium-i ao aser mezüngbuba season nung Belgian Cup koka liasü.


Pa 2021 küm mezüngbuba linük team nungi international asaya ka nung shilem agi aser tang tashi nung 23 ben asayar lir, kong taoba küm Copa America semi-finals tonga asayaba densesma lir.

"Ni Crystal Palace amala club tejen aser club tulu ka nung arua densesma atema kanga pelar," ta pai ashi.

"Ni kanga jangra ademer aser pelar aser asayatsü asoshi kanga yonga atar," ta paisa shisem.

Osang ajanga ashiba agi, Munoz-i pa iba Premier League club yagi arutsü atema Genk nung longkak aita liasü.

Munoz shiba Selhurst Park nung külem Colombia nung



Daniel Munoz

Jefferson Lerma den longjemtsü ali, pai tang asaya aliba season nung league asaya 17 nung asayaogo aser iba mapang goal pongu idaktsüba den ka assist süja liasü.

Palace mendenbuba Steve Parish-i ashiba agi, "Daniel amala sempet tajung aketba asayar ka agizüksü asoshi onok kanga yongya atar."

"Pai club aser linük tenung nungi temaba jenjang nung asayaba tajangshiba bona lir aser pa ya full-back asayar tajung ka lir, koba pa asayaba yimya agi kuli agütsü.

"Pa sempet, asaya yimya aser temulungtetba tulu aliba ajanga season nung tanungba asayatem nung team nem teyari tulu agütsütsü," ta Parish-isa shisem.

BILEMDANGANG

"Shibai mangadangi telangzüba agütsür, aji pa asoshi maksü aser tamashiba."